





gal-














1615

7. Parl. 15 12

L. 2683

211

RESPONSE

A LA HARANGVE

FAITE PAR

L'ILLVSTRISIME

CARDINAL DV PERRON,

à Paris l'an 1615.

Par M. V. D. C. C. D.

Sacrifiez vn sacrifice de Iustice.

THE NEW YORK
LIBRARY

62

39

2213

2017 年 12 月 13 日

1000

[illegible]

1892

MONSIEUR,

Les Antiens ont appellé la renommée (vn mal) qui courant d'une legere vitesse s'acquiert en passant, de si puissantes forces dedans les esprits des hommes, qu'il n'est en leur pouuoir de s'opposer à sa course, ny d'empescher les vehemens effets de sa violence: non point que ce soit tousiours vn mal de sa nature, mais pource qu'estant grandemēt susceptible des bonnes ou mauuaises qualitez du sujet où elle s'attache, & les inclinations naturelles des hōmes estans beaucoup plus penchātes au mal qu'au bien, elle en prent aisément la mauuaise nature, dont elle s'est acquis ce nom de mal.

Les premieres odeurs de vostre vertueuse jeunesse s'estās exallees iusques à la Cour des Roys; y rencontrèrent vn si gracieux obiect, que ce mal s'y changeant en qualité contraire, vostre vertu trouua place en la douce bonté du Roy Henry III. où ayant amplement estendu ses racines, elle a produit les fruits dont la saueur a depuis esté goustee par toute la Chrestienté.

Ainsi ceste renommée sortant de la bonne opinion de ce grand Roy, se fortifia si puissamment dedans la Cour en peu d'heures: que nonobstāt le malheur de sa perte, vous

fustes chery des Seigneurs & des Princes, iusques à posseder l'ame & le courage de nostre dernier Roy, le plus grād & le plus heureux de tous les Roys de la terre: lequel vo^{us} recognoissez vous auoir esleué par tous les degrez d'honneur iusques au souuerain de vostre fortune. Le dy souuerain, puisque l'assomption du siege Apostolique est interdite aux François.

Aristote disoit de ceux qui sont esleuez aux hautes charges, qu'ils ressembtent aux Architectes mōtez au sommet des edifices, ausquels cōme exposez à la veuë d'un chacun, on recognoist facilement les deffauts de leurs corsages. Car la nature ayant originaiement tourné le visage & la veuë de l'homme vers le Ciel, il s'adonne naturellement à la consideration des choses esleuees.

Vn antien Sage donnant le precepte des mœurs à son fils, l'aduertissoit de ne point monter en haut, mais de craindre l'euene-ment d'une malheureuse cheute, voulant signifier que ceux qui sont esleuez au sommet de la fortune, en doiuent grandement redouter vne precipitatiō qui est quasi toujours certaine: la fortune estant depeinte sur vne boule, & tenant les coings d'un grād voile pouffé du vent pour monstrier que ce

qui est subiect à l'impetuosité des vents & mobilité d'une boule, est continuellement au danger de precipice.

La renommée n'est pas sus une boule, mais si mouuante, que de sa seule mobilité elle prent sa vigueur & sa force. Elle n'est pas depeinte avec un voile, mais avec des ailes de tous costez, & pleine de vents qui en sortēt, & le plus souuent dommageables.

Or l'honneur estant le seul prix de la vertu, l'honneur disje qui n'est autre chose que la bonne reputation que les hommes s'acquierrent par leurs vertueuses actions, Qui est-ce qui se peut asseurer sur l'inconstant mouuement d'une chose si legere, si ce n'est celuy qui par le poix solide de ses constantes vertus, retient ses actions en un mesme estat de bien faire?

Ce n'est pas aussi sans raisō, que les larmes aux yeux, vous auiez refusé cette perilleuse charge, de mettre en doute l'autorité de vostre Roy, & soustenir que sa puissance royale despend de la volōté d'un autre Prince: puis qu'il est tres-naturel à chacun de pleurer sa perte, & qu'il n'y a pas un de vos amis qui n'ait senty son ame trauersee de mille poignants regrets, de vous voir par une bonté trop naïfue porter vostre tant glorieux re-

nom au trespas: Et seruir de trophée aux ennemis de vostre vertu.

Si i'eusse esté si heureux, que de m'acquiescer autant de familiarité pres de vous, que mon affectiō me portoit à admirer vos merites, ma voix & mes larmes eussent esté assez fortes pour retenir vostre volonté mal disposée à cet œuvre: car ceux qui vous y ont poussé se sont seruis de vous comme les Grecs firent d'Achille, pour le siege de Troye.

Mais puis que la pierre en est jettee, que vostre suffisance s'est sentie obligée à cette entreprise, par telles prieres, & par les liens de vostre eminente dignité romaine: Que vostre obligation naturelle à la defence de vos Roys, & leurs bien-faits immenses, ne vous ont peu retenir de cet assault; six raisons pressent mon courage d'en prendre le party, & contredire vos allegations. La premiere, est la fidelité naturelle que vous & moy deuons à nostre Roy, contre toute oppressiō estrangere. La seconde, est mon desir de preuenir quelque rude critique, autant esloigné de vous aimer, que ie suis prompt de vous seruir. La troisieme, est la facilité de la dispute, que vous ne faites point Theologique: mais la iettant dedans le seul fil des histoires & lecture des liures, vous permettez à cha-

cun de ceux qui peuuent lire, d'en reciter les textes contraires à ceux que vous auez alleguez. La 4. est la commodité des armes que me mettez en main, les Autheurs que vous alleguez, & ce que i'ay appris aux escoles de vos predications, de vos discours, & de vostre propre harangue. La 5. est l'honneur du combat avec vn si grand Capitaine, que ie sens descouuert à mon aduantage, qui se presente au champ d'vne contenance hardie: mais la condition de tous les hommes, les soubsmettāt aux perils d'vne blesseure mortelle, il est besoin de couvrir les parties nobles, auxquelles reside le seul poinct de la vie. Et la 6. est celle de l'occasion presente, que i'ay tousiours attendue, & que i'embrasse estroitement, comme sujet precieux de donner lustre à vos escrits, & contenter mon cœur aux admirations de vostre eloquence.

Eloquence que i'admire aux industrieux attraitz de l'attention des escoutans, au iudicieux ordre de la conduite de vostre discours, aux poinctes releuees de vos sensibles emotions, aux subtilitez de vos persuasiōs, & aux choix des textes que vous appropriez si artificiellemēt au sujet de vostre harāgue.

Vostre Exorde a deux poincts suffisants

de retenir les ames plus variables du peuple, à la curiosité de vous entendre. Le 1. est de l'honorable nom, que vous donnez au tiers Estat, de depost sacré de la Iustice du Prince: ce qui leur est vne pure gratification tiree d'un Ambleme.

Car bien que le precieux tresor de la Iustice des Roys soit aujourd'huy en la conduite de plusieurs personnes de ce tiers ordre: c'est plustost la corruption du siecle qui a introduit ceux de cet ordre dedas l'administration de la Iustice, qu'elle n'y a esté deposee. Ainsi que la corruption s'est insensiblement glissée non seulemēt dedans tous les Ordres de la France, mais dedans toutes les conditions des François: Comme à l'administratiō de l'Eglise & choses saintes; ont esté veus des Heretiques, Simoniaques, Enchanteurs, Magiciens, & autres damnable personnes, dont les mauuais exemples feroient capables de ruīner la religion de fonds en comble, si Dieu n'en auoit plus de soing que les hommes. Aux plus eminentes charges de la guerre, ont esté des personnes esleuees, qui ne virent iamais que la paix. Aux plus hautes dignitez de la maisō Royale, mesmes à celles qui portent les noms de Gentilshommes, ont esté mises des personnes

nes roturieres. Bref il n'y a aucune partie qui n'ait esté alteree dedans l'Estat, ainsi que la condition de ceux de la Iustice.

Mais le commencement est tout autre: Et le regardant en son origine & perfection, il n'y a Auteur qui ne tesmoigne que la Iustice de Dieu ayant esté commise aux Roys pour la rendre à ses peuples, ils en ont soigneusement retenu la principale administration entre leurs mains, iusques à ce que ceux de la seconde lignee, donnans la charge des Prouinces aux officiers qu'ils appelloient Comtes, leur commirent aussi la distribution de leur iustice. Et au commencement de la derniere race, plusieurs de ces Comtes, d'Officiers estans faicts Seigneurs propriétaires des terres, pour recognoissance des seruices par eux rendus à Huë Capet, & iusques aux Roys Philippes le Bel, Loys Hutin, & Charles V I. la Iustice des Cours de Parlemens a tousiours esté rendue par les Roys, Princes & autres Seigneurs, principaux de la Noblesse, avec l'ayde de quelques Ecclesiastiques (nommez Clercs) qui se trouuoient lors quasi seuls, instruits aux lettres dans tout le Royaume. Ce que ie ne tire point de ces resueuses allegations des Historiens, mais des Registres sacrez du

parlemēt de Paris. Et entre autres d'un Arrest del'ā 1410. par lequel sur vn refus fait par le Parlement, d'admettre en quelques offices laics des personnes roturieres, fut par le Roy seant en cette Cour avec plusieurs Princes & grands Seigneurs du Royaume, resolu & arresté, qu'il n'y en auroit aucun receu qui ne fust Noble. Ce qui a tousiours esté observé, iusques à ce que la marchandise ait esté meslée dedans les corps de Iustice, & les offices mis à pris, donnez à l'argent plustost qu'à la vertu.

Le second poinct de vostre industrie, est l'honorable recognoissance que vous faites des obligations naturelles & ciuiles des Ecclesiastiques du Royaume enuers leur Roy, par la precaution de laquelle il semble que vous ayez plus de dessein d'extendre sa puissance Royale, que de diminuer la moindre force de son autorité. Ce qui est suiuy de la protestation tres-expresse, dont vous admettez le premier chef de l'article sur les assassins des Roys. Mais en accordant le second chef, vous y donnez vne atteinte. Et en desniant le troisieme vous ruynez tous les trois. Et qui pis est vous dressez les forces de vos allegations & rapports de vos textes, à la destruction mesmes du cas restrinct par vostre affirmatiue.

Sur ce premier chef, Vous donnez *Anathe-*
me, malediction & damnation, à quiconque assas-
 sine les Roys, mesmes vous criez avec le sacré Con-
 cile de Constance, contre les meurtriers des Roys,
 voire de ceux que l'on pretendroit estre deuenus
 Tyrans. Sur le 2. vous dites croire, qu'en la nuë
 administratiõ des choses temporelles, nos Roys de-
 pendent immediatement de Dieu, & qu'ils ne re-
 cognoissent aucune puissance par dessus eux que la
 siene. Vous tenez dittes vous, ces deux poinçts
 certains & indubitables, Sçauoir le premier de cer-
 titude diuine & Theologique, & le 2. de certi-
 tude humaine & Historique. Et sur le 3. Que
 non seulement toutes autres parties de l'Eglise qui
 sont auourd'huy au monde (hors de France) tien-
 nent que (en cas de Princes heretiques ou apostats
 & persecutans la foy) les sujets peuuent estre ab-
 sous du serment fait à eux ou à leurs predecesseurs,
 mais mesmes que depuis vnze cens ans il n'y a eu
 siecle auquel en diuerses Natiõs, cette doctrine n'ait
 esté creuë & pratquee, Et outre qu'elle a esté con-
 stamment tenuë en France, où nos Roys & parti-
 culierement ceux de la derniere race, l'ont protegee
 par leur autorité & par leurs armes, où nos Con-
 ciles l'ont appuyee & maintenue, où tous nos E-
 uesques & Docteurs Scholastiques, depuis que l'e-
 chole de la Theologie est instituee iusques à nos
 iours, l'ont escrite, preschee & enseignee, & où fi-

nalement tous nos Magistrats, Officiers & Iuriconsultes l'ont suivie & favorisée, voire souuēt pour des crimes de religion, plus legers que l'Herésie ou Apostasie.

Vous dites aussi que ceux qui ont dressé l'article, l'ont basti sur le patron de la doctrine d'Angleterre: & que de vouloir enclorre ce dernier chef en la mesme obligation de foy & sous le mesme decret d'Anatheme, de ceux qui assassinent les Roys, c'est tomber en quatre inconueniēs. Qui sont de forcer les ames, en les obligeant de croire sous peine d'Anatheme & comme doctrine de foy, ce dont le contraire est tenu par toutes les autres parties de l'Eglise Catholique, & l'a esté iusques icy par leurs predecesseurs. C'est renuerser l'autorité de l'Eglise, que de vouloir que les Laiques aysent entreprendre de iuger de la foy. C'est nous precipiter en vn schisme euidēt & ineuitable, Et renoncer à la communion du Chef & des autres parties de l'Eglise, que de tenir cette proposition negative, qui est contraire à tous les autres peuples de l'Eglise Catholique, Et que c'est mettre en plus grand peril la vie & l'Estat de nos Roys, que d'infirmier par le meslange d'vne chose cōtredite, ce qui est tenu pour certain & indubitable.

Et moy la permission premierement demandee à vostre illustre dignité que i'honore, ie maintiens pour le Roy comme

son tres-humble & fidelle sujet, seruiteur,
vassal, & honoré d'une charge qui m'oblige
encore d'avantage, huit points veritables.
Le premier est, que hors de temps & de saison,
on vous a poulsé à disputer cette proposition. Le 2.
qu'il y a de l'equivoque en ces mots, DES ROYS
QUE L'ON PRETENDROIT ESTRE DEVENUS TY-
RANS. Le 3. qu'il y a de l'equivoque en la conces-
sion que vous faites du 2. chef en ces mots, D'UNE
ADMINISTRATION DES CHOSSES TEMPOREL-
LES. Le 4. que ce que vous dites cōceder de ce 2. chef
de certitude humaine & historique, l'est aussi biē de
certitude diuine, que de l'assassinat des Rois. Le 5.
que ceste proposition n'est point de foy ny de Reli-
gion mais purement d'Estat, ne peut causer de schis-
me, & est encore auourd'huy entré en autres par-
ties de l'Eglise que celle de France. Le 6. que de
tout temps, mesmes depuis vnze cens ans les plus
saints Personnages de l'Eglise, Papes, Docteurs, &
autres Chrestiens & vrais Catholiques, ont tenu
la negative, mesmes par effect & obeissance. Et le
7. que c'est vn crime de leze Majesté dedans
toutes les Seigneuries temporelles de l'uni-
uers, voire dedans celles des Papes, que de
soustenir l'affirmatiue.

Et afin que cette miennē response se puis-
se sauuer de toute sinistre interpretation, ie
vous supplie tres-humblement trouuer bon.

que ie proteste deux choses. L'une que par la grace de Dieu, ie ne consens en quelque point que ce soit, à aucune secte heretique, & suis vrayemēt de toute creance, de la sainte Eglise Catholique, dont le chef visible (& ministerieux, comme vous l'appellez Monsieur) est nostre saint Pere le Pape, successeur de saint Pierre. Et hors de laquelle ie croy n'y auoir point de salut. Et l'autre, que ma conscience & le seruice de mon Roy, sont seuls auteurs de mon entreprise: & vous supplie tres-humblement, puis que nous sommes tous de la mesme Eglise Catholique, me permettre qu'en appellant ceux de l'affirmatiue, qui soustiennent que nos Roys peuuent estre deposez en quelque cas par le Pape, ie puisse appeller François ceux qui tiennent la negatiue (disans) qu'ils ne peuuent estre deposez pour quelque cause que ce soit par les Papes ny autres Princes, sans que ceux que i'appelleray François encourent aucune note de sequestre, d'auec les autres Catholiques. Estāt contraint de les restraindre à ce nom pour leur oster le blasme d'adherer au serment d'Angleterre.

Je diray donc que les François qui ont dressé l'article que vous disputez, n'ont aucune intelligence d'Estat ny de Religion,

avec le Roy d'Angleterre, ny avec ses sujets. Qu'ils sont en la mesme Eglise Catholique que vous estes (pardonnez à la comparaison s'il vous plaist) autant confirmez en icelle, & prests d'endurer le martyre plustost que de la changer, qu'aucun Euesque ou Prelat de France. Qu'ils n'ont point esté de ceux qui pendent les mal-heureux orages des derniers troubles, ont porté les flambeaux de la doctrine de déposer les Roys, ou se soulever contre eux. Mais de ceux qui sous les diuines Loix du Vieil & du Nouveau Testament, ont tousiours adoré leurs sacrées personnes, de l'adoration que Salomon, au cours de sa plus sainte vie, se laissoit adorer de sa mere Bersabée. Que si les termes de cet article en conseruans l'autorité de nos Roys contre toute inuasion estrangere, embrassent aussi la conseruation du Roy d'Angleterre, & generally de tous les Roys de la Chrestienté, cōtre les iniques entreprises sur le Téporel de leurs Coronnes. Ce n'est pas pour croistre leur autorité, mais pour conseruer legitiment celle de nostre Roy.

Je dy aussi, que tous les François ou Royaux, croient que hors de temps & de saison, pour deux raisons, ceux de l'affirmatiue

ont debatul'article. La premiere raison est, que la question estant comme vous dittes problematique, il est autant permis sans bleffer sa consciëce, aux François seruiteurs du Roy, de soustenir la negatiue pour sa liberte, qu'aux autres l'affirmatiue pour extēdre sur luy vne puissance indeuë. Voire plus ils croient que tous ceux qui ne soustienent la negatiue, sont indignes de respirer l'air de sa France, puis qu'aucune loy diuine ny humaine ne les oblige à asseurer l'affirmatiue.

L'autre raison est, que le cas auquel vous posez vostre affirmatiue, estāt vne chimere & chose qui n'est iamais arriüée, & n'a même donné la peur pendant le regne de ce grand Roy Henry, lors qu'il estoit hors de l'Eglise, & si courageusement suiuy à toutes sortes de hazards contre ceux qui tenoient l'affirmatiue & la cause que vous embrassez au iourd'huy: c'est trop mal presager de la grace de Dieu enuers ses successeurs, de leur bonne vie, & de leur constante fidelité & preud'homie, que de poser pour doctrine de foy dedans son peuple, en vne telle assemblée, vne assertion qui n'est authorisee d'aucune constitution de Dieu ny des hommes, ains contraire à la doctrine Euangelique.

Plus

Plus hors de saison encore l'avez vous fait
 esclatter, aujourd'huy qu'une infinie mul-
 titude de malins esprits, s'efforcent de
 seduire les peuples à se soulever contre
 les Roys, & d'une main parricide leur oster
 la vie. Aujourd'huy disje, que monsieur le
 Cardinal Belarmin, Becanus, Mariana, Mo-
 lina, & une infinité d'autres, viennent à cete
 abominable conclusion de parricide, (que
 ie vous croy fort abhorrer) par la pretendue
 deposition que vous soustenez si affirmati-
 uement par voire Harangue. Car ils disent
*Que si les Roys sont Tyrans & se gouvernent mal-
 enuers leurs peuples, il les faut aduertir de se refor-
 mer. Et s'ils ne se corrigēt, le Pape les excommunie &*
*les prine de leurs Royaumes, delaisant l'execu-
 tion de mort au premier malheureux qui la vouldra
 entreprendre. Est-ce pas donc legeremēt cou-
 rir à la ruine de l'autorité des Roys, & en
 autoriser les parricides, que d'en introdui-
 re les depositions, qui en sont les premieres
 causes? Il est sans doute que si on ouvre cete
 porte, on y entrera d'autant plustost, que les
 Ecclesiastiques en enseignent le chemin, &
 que nous lavoyōs desia brisee pour aller aux
 meurtres.*

Passant au second poinct, il y a vn equivo-
 que qui corrompt tout le sens de vos Ana-

Bel. p. 76

tr. d. p. f.

p. ad C. B.

Bec. p. 123

125. 138.

140. l. d.

cō. Arg.

Mar. l. 3.

d. Re. *Et*

R. Inst.

Mol. co.

4. tr. disp.

6. d. Inst.

iur.

themes, maledictions & damnations, sous ce mot, *De ceux que l'on pretendroit Tyrans*. Car il il est certain que ceux qui vo⁹ ont baillé ces memoires, ie dy ainsi, pour ce qu'estât François, seruiteur du Roy comme vous dites, & fort hōme de bien cōme chacun vous reconnoist, vous n'aurez pas puisé mot à mot, ce qui est couché par vostre Harāgue du liu. du Cardinal Belarmin & des autres desusdits, si pernicious, qu'ils ont été partie cēsurez de la Sorbōne, & tous condamnez au feu, par les arrests de cete tant Auguste Cour de Parlement de Paris, cōme faux & seditieux. Ceux disje, qui vous ont baillé ces memoires, les ayans tirez de mot à mot des liures susdits, par lesquels ils concluent, que pendant que les Roys sont seulement pretendus Tyrans & ne sont encores iugez tels, il n'est loisible d'attenter à leurs personnes. Mais si tost que le Pape ou vn petit conseil de six ou sept gens de bien soubz luy, l'auront resolu, ils sont tenus pour Tyrans, destituez de leurs dignitez Royalles, & puis habandonnez au premier qui pour le bien de l'estat & salut des ames, se voudra resoudre à leur oster la vie.

De sorte que Messieurs de l'affirmatiue, par ces voyes illegitimes, disposent sourdement des Royaumes & de la vie des Roys, sans qu'ils en sçachent rien. Il est Roy qui il leur plaist, il est Tyran qui ils veulent. Et les

rendans de pire condition que les malfai-
cteurs, les habandonnent corps & ames à la
mort eternelle. Voila pas de beaux poinçts
de Religion? aussi ne les veulent-ils prouuer
que par exemple & non par le droit.

Le 3. poinçt, est de l'equiuoque que vous
apportez au secōd chef de l'article, en ce que
vous cōcedez que nos Roys, en l'administra-
tion des choses temporelles, dependent im-
mediatement de Dieu, & vous y glissez ce
mot de *nuē*, disant *en la nue administratiō*. Il n'y
a point de doute que ce ne soit pour porter
toute l'autorité de la terre au Pape, comme
ces auteurs susdits l'ont écrit, disans que la
partie plus precieuse, attire la moins pre-
cieuse: l'ame estant beaucoup plus excellen-
te que le corps, & le gouuernement d'icelle
en estant souuerainement donné au Pape, il
s'ensuit que le Pape est aussi souuerain de
toutes les choses temporelles. Or il est cer-
tain qu'il n'y a rien d'apte & necessaire à l'hō-
me, qui par la forme de ces equiuocatiōs, ne
se puisse dire mixte, pour l'vsage de sō corps
& de son ame: & ne peut commettre aucun
crime, qui ne soit sujet à peine spirituelle, &
à absolution. Et par consequent, si vous ne
laissez à nostre Roy, que l'administration
souueraine de ce qui est purement temporel.

ceux de l'affirmative trouueroiēt tousiours par leurs equiuocations & desguisemēs des escritures que les Roys seroient leurs sujets en tout & par tout des biēs & de la vie. Qui seroit vne tres tyrannique, barbare & impie domination, puis qu'ils les condannēt sans les ouïr, Et que Dieu mesme a dit auant que de iuger *ie descendray & verray*, combien qu'il vist desia tout.

Le 4. poinct, est sur ce que vous accordez ces deux poincts estre veritables, *que c'est chose damnable d'attenter aux sacrees personnes des Roys. Et qu'ils tiennent leurs administratiōs temporelles, immediatemēt de Dieu*: mais que celuy des assassinats, *Vous le tenez de certitude diuine & Theologique*, & celuy de l'administration temporelle, vous le tenez seulement *De certitude humaine & historique*. Je confesse que cete distinction m'empesche seulement de ce que de l'une ny de l'autre de vos certitudes, vous n'aportez aucun exemple pour interpreter vostre dire, veu que l'une & l'autre resulte des ordonnances diuines, qui nous sont egallement certifiees par l'escriture, qui est le fondement solide sur lequel i'appuye mon affirmation, *que le dernier est autant de certitude diuine que le premier*.

Heb. c. ii.

La foy est selon saint Paul, la creance

des choses qui sont & ne nous apparoissent point. Mais dont la certitude de la parole apporte parfaite cognoissance à nostre entendement. Il n'y a personne qui puisse dire certainement, les raisons de la volonté de Dieu, car tout homme est menteur: il n'y a que luy de veritable. Nous prenons donc la creance par la foy qu'il nous fait la grace d'adiouster à ses paroles.

Or est-il qu'il nous a également ordonné d'obeir à nostre Roy, & deffendu de tuer. Il nous a également fait entendre les puissances qu'il a donnees aux Roys, & deffendu les meurtres. Car le premier ne se prend que de ce qu'il a dit generalement, *tu ne tueras* ^{Ex.} point. Ne vueillez attenter aucune chose sur mes ^{20.} ^{Le. 19} Christs. Qui frapera du glaiue il mourra du glaiue. ^{Par.} Ne touchez aux sacrees Majestez des Roys, ^{16.} ^{Psalm} pour ce qu'ils sont les vivantes images de Dieu. Et ^{104.} autres passages semblables qui deffendent ^{Mat.} les meurtres. Mais outre que tous ces passages font pour mon dernier poinct; il y en a plusieurs autres aussi forts, pour en faire preuve. Je ne suis pas Theologien, mais recitant ce que j'ay appris aux sermons que vostre illustre dignité a voulu faire i'en apporteray autant ou plus de passages de l'escriture, que ceux de l'affirmatiue n'en peuuent ap-

porter , pour preuue du premier poinct.

Premierement Saül a esté constitué Roy pour commander à tout le Peuple de Dieu. Les droicts de ce Roy ayans esté expliquez aux sujets (estre de disposer de leurs personnes & de leurs biens à sa volonté, ils l'ont accepté à cete charge . Samuel a anoncé au
 I. Reg. peuple, *Le Seigneur dit, cecy sera le droict du Roy
 a. 8. qui vous commandera , Il se saisira de vous & de vos enfans & en fera ses serfs. Il prendra la dixiesme partie de vos reuenus & de vos bestiaux , & donnera vos heritages à ses Valets: & si vous criez contre luy, le Seigneur ne vous escouterà point. Et en vn autre lieu est escrit que Saül ayant entendu que les ennemis auoiēt couru dedans ses terres. Il mit des bœufs qui marchoiēt deuant luy en pieces, & mādā par toutes les terres d'Israël, que quiconque ne sortiroit & ne le suiuroit , il en feroit ainsi fait à ses bœufs. Et encore en vn autre lieu, le Roy enuoye querir Achimelech le grād Prestre de Nobe avec toute sa famille de Prestre, & luy dict escoute moy. (Achimelech respond) me voicy Seigneur, n'est-ce pas toy qui as receu Dauid en ta maison, & conjuré avec luy contre moy? Il respond. I'ay biē receu Dauid vostre gendre, mais ne croyez pas que moy (vostre seruiteur) i'aye conjuré contre vous. Et vn peu apres, il commande que tous ces Prestres fussent mis à mort , & en fut tué*

85. vestus de leurs habits Sacerdotaux: & cette executiō fut faite sans aucune resistance.

Dauid estant poursuivy de tous costez par Saül qui cherchoit à le tuer: Saül entre dedans vne caverne, en l'interieur de laquelle il estoit caché avec ces gens en la terre d'Engadi. Et luy ayant esté par eux dit, *Voicy le iour duquelle Seigneur t'a dit, ie te bailleray ton ennemy pour luy faire ce qu'il te plaira*: Dauid se leua lors secretement, & coupa le bord du manteau de Saül, dont apres il frapa son cœur, & dit à ses hommes, *Le Seigneur me soit propice: Je ne feray point telle chose à mon Seigneur, que de mettre la main sur luy*. Et toutefois Saül estoit lors (de droit) déposé de son Royaume, & Dauid ordonné en sa place.

Et vn peu apres, Dauid estant refugié en la montaigne d'Hachila, Saül y vint camper son armee pour le prendre: & lors Dauid se resolut de le surprendre de nuit. De sorte que menât avec luy Abisai tout seul, ils descendirent & le trouuerent couché, & dormant en sa tente au milieu du peuple, sa lance fichee en terre vers son cheuet, & Abisai dit à Dauid, *Dieu a auourd'huy enclos ton ennemy en tes mains, maintenant dont, que ie le perce d'une lance en la terre d'un coup, & il ne sera besoin de secōder*. Et Dauid luy dit, *Ne l'occis point,*

car qui est celuy qui estendra sa main sur l'Oinct du Seigneur & sera innocent?

Cet obeyssant & misterieux respect de David enuers ce Roy deposé, fut si continuemēt entretenu, qu'après sa mort vn ieune Amalecite luy estant venu apporter son Diademe, & le bracelet de son braz, en luy annonçant d'auoir tué Saül par son commandement: David le fit executer de mort, luy disant, *As tu osé mettre la main sur l'Oinct du Seigneur?*

Ce mesme David que Dieu trouuoit selon son cœur, rendit le dernier exercice de la Iustice diuine en terre & dedans son liēt de la mort, ordonne la punition de Semei, (Pource qu'il l'auoit maudit:)& dit à Salomon son fils. successeur à son Empire, *tu as pres de toy Semei, lequel m'a maudit allant aux armées: Je luy ay promis de ne le point tuer, mais ne souffre point qu'il demeure impuni, tu feras descendre ses derniers iours avec sang aux enfers.*

Cete bonté & Iustice de David (ayans esté resignées avec le Royaume à Salomon son fils, par les dernieres paroles de son testament) il fit punir de mort son propre frere Adonias, pour s'estre esleué contre le Roy son pere, deposa Abiatar Prestre de la loy, & constitua Sadoc en sa place.

Ainsi

Ainsi se cognoist par les certains tesmoi-
gnages du vieil Testament, que toute admi-
nistration temporelle du Royaume estoit
donnee aux Roys, & authorisé de Dieu, non
seulemēt sur les persōnes des seculiers, mais
sur les Prestres & principaux ministres de
l'Eglise, iusques à depositiō de leurs Prestri-
ses & execution de mort.

Cecy est confirmé par nostre Sauueur Ie-
sus-Christ, lequel n'ayant voulu prédre part
au Royaume de ce monde, *commande qu'on*
obeisse à Cesar & qu'on rende ce qui luy est deub.
Il reprenoit saint Pierre de l'auoir voulu def-
fendre par les armes temporelles, luy disant,
Ne sçay tu pas que ie puis prier mon Pere & il *Mat.*
me baillera presentement plus de douze legions *c. 26*
d'AnGES?

Et estant accusé en iugement, il fut mené
à Herodes & à Pilate, desquels recognois-
sant la Iurisdiction temporelle, il subit les in-
terrogatoires, & dit à Pilate, *tu n'aurois aucu-* *Ioā.*
ne puissance sur moy s'il ne t'estoit donné d'en haut. *c. 19.*
Par cela on recognoist que le souuerain Pō-
tife ne prent cognoissance & Iurisdiction que
des choses nuēment spirituelles & de Reli-
gion. Et le surplus des peines, il en fait les
poursuittes pardeuant les Princes seculiers.
Encore que nostre Sauueur fust accusé de

blaspheme : & que cete iurisdiction fust en la main d'un Prince Payen , qui auoit vsurpé la couronne des Roys de Iuda & d'Israël, comme le Turc a fait celle des Empereurs & Roys Chrestiens.

S. P. S. Paul confirme cete doctrine par termes expres d'obeyssance, disant , *Il faut obeir*
 à R. *aux Roys mesmes discoles , sur peine d' Anatheme.*
 c. 13. *Sap. c. 6.* Et en vn autre lieu, *Toute personne soit subiecte aux puissances ; superieures : car il n'y a point de puissance sinon de par Dieu : & celuy qui resiste aux puissances, resiste à l'ordonnance de Dieu : & ceux qui y resistent feront venir damnation sur eux.*

Et pour monstrier qu'il parle de la puissance temporelle, il suit, disant , *Le Prince est seruiteur de Dieu pour ton bien. Ils sont ministres de Dieu, & pour ce payez leur les tributs.* S. Pierre
 1. c. 2 en dit autant , *soyez sujets à tout ordre humain pour l'amour de Dieu, soit au Roy comme au superieur, soit aux gouuerneurs comme enuoyez de luy : car telle est la volonté de Dieu.* Puis apres , *Craignez Dieu & honorez le Roy.* Cete doctrine Euangelique a esté suiuiue & declarée par les Canons & les Papes, & entre autres Isidore rapporte au Canon commençant, *les Princes du siecle. Que à eux est deposee de la main de Dieu, le soin des Eglises, & qu'il leur demande raison de leur Eglise qu'il a mise en leur puissance.*

Qui est-ce donc, apres ces textes expres, du vieil & du nouveau testamēt, diuins oracles de la volonté de Dieu. & des Canons de sa sainte Eglise, qui pourra nier que la puissance temporelle des Roys, ne soit de *certitude diuine*, puis qu'il n'y a rien de si certain que Dieu & sa parole? Que si quelqu'un doutoit de leur certitude, il seroit du tout sans foy, & sans grace du S. Esprit. Je le prononce hardiement & affirmatiuement, pource que vous me l'avez ainsi enseigné dedās la Chaire de verité (Monsieur) & sur vos veritables allegatiōs i'en ay veu les textes qui le portēt.

Tous ces tesmoignages saints & sacrez me seruirōt pour la preuue du 5. poinct que ie mets en auant, & monstrier, *Que si cete proposition estoit de foy & Religion, la negative en seroit de pure doctrine, & non l'affirmative: qui n'est tenue pour doctrine en quelque partie que ce soit de l'Eglise Chrestienne.*

Je recognois certes & admire infinimēt la grandeur de vostre esprit, non seulement à se seruir de termes pressans, & constituer vn excellēt ordre en son discours: mais aussi à sçauoir disposer toutes choses à son aduantage: comme ces experimentez Capitaines qui se sçauent oportunement preualoir au logement d'une armee, de quelque ruisseau,

quelque coline, quelque bois, ou de la proximité de quelque forteresse, & de donner à leurs ennemis le Soleil dedās la veuë. Ainsi, Monsieur, vous auez dextrement opposé à toutes personnes que cete question est de foy & de religion, & que ne le voulez disputer par les voyes de droict, mais seulement par celles du fait.

Et cela sur vostre assurance que tous les Theologiens, ausquels seuls appartient de decider de la foy & Religion, plians sous l'autorité de vostre grande reputation & admirable doctrine ne l'oseront contredire, mais plustost diront, comme les disciples de Pitagore *le maistre l'a dit*. Quant aux Laïques vous estes assuré qu'ils ne s'aduançerōt pas de parler de cela: & que du fait vous pouuez apporter des exemples.

Mais, Monsieur, vostre illustre dignité permettant (comme j'espere de sa liberale faueur) de dire tout ce qui est necessaire pour deffendre l'autorité Royale de nostre commun Prince, elle ne trouuera mauuais, s'il luy plaist, que ie die, que les François ses seruiteurs maintiennent la question estre purement d'estat & non de foy.

Et j'argumente ainsi, *Tout ce qui est de la foy est déterminé par l'Escripture sainte,*

ou par les constitutions de l'Eglise vniuerselle, ou par le chef visible d'icelle en la forme qu'il doit estre. Or que les Papes puissent deposer les Rois en quelque sorte que ce soit, il n'est aucunement déterminé, & par consequent la foy de l'Eglise n'oblige point de croire l'affirmatiue. Je dy plus que toute la religion consiste en doctrine & en discipline: ce qui est de doctrine, est ordonné & commandé par ces mesmes constitutions sacrées; & tout ce qui n'y est point donné, pour ordonnance ou commandement n'est de doctrine: & partant l'affirmatiue n'est pas vne doctrine. Quant à la discipline, tant s'en faut qu'elle en soit, que au contraire, toutes les predications, exhortations de nos Curez & gens de bien, qui nous annoncent l'Euangile, nous admonestent incessamment, de prier Dieu pour nos Roys, de leur obeyr & les seruir: & aucun ne nous dict qu'ils soient destituables: il n'y a donc point d'apparence, que vostre affirmatiue se puisse dire estre vne position de de foy ny de religion.

Mais vous dittes à cela, que y ayant deux nœuds, par lesquels les subjects sont obligez d'obeyr à leur Prince, l'un pour le bien de la paix, & de peur des peines temporelles; & l'autre pour le respect de Dieu, & euitier les peines eternelles, que les Ecclesiastiques doiuent inger, si en cas

d'heresie ce nœud doit estre dissoubs ou non, & non pas le Magistrat politique.

A quoy ie respons qu'il y a aussi peu d'apparence en l'un qu'en l'autre, autrement qu'il ne faudroit point du tout de Roys; car tout bien vient de Dieu, toutes constitutions, commandemens ou preceptes de religion & de police, ont esté ordonnez de luy. Or l'homme ne peut contreuenir à aucun commandement de Dieu, qu'il ne soit en peché mortel, & n'ait besoin du Prestre pour l'absoudre; il seroit donc necessaire pour recognoistre si vn criminel auroit commis vn peché mortel, comme de sacrilege, parricide, d'inceste, ou d'autre semblable, que les Ecclesiastiques prissēt cognoissance, & iugeassent s'il deuroit estre absoubs ou condamné, ce qui leur est tres-expressément deffendu par les Canons: Nous ne sommes pas en doute que toute personne deuenant heretiques, ne soit en la iurisdiction des Ecclesiastiques, pour iuger par eux de l'heresie & des peines spirituelles conuenables à ce peché: Mais quant à la peine accidentale pour ce crime, soit d'amende pecuniaire, confiscatiō de corps ou de biens, elle est purement politique: Et s'asseurent les François que le saint Pere ne le voudroit pas pretendre au-

trement: Ainsi si vn Roy deuenoit heretique ou apostat, nous ne doubtons point qu'il ne soit en la iurisdiction Ecclesiastique, pour luy donner la peine spirituelle, qui est de l'excommunication ou l'absolution: Mais quant à la deposition du temporel, ce feroit passer à la puissance pure temporelle, (que les Iuges Laics appellent infliction de corps.) Ce qui ne peut non plus appartenir aux Papes sur les Roys, que aux Curez sur les particuliers subjects; car il y a bien difference de iuger de l'excommunication ou de la priuation de biens temporels.

Mais qui doute que pour le crime d'heresie, (dont on punissoit antiënement de mort ceux qui en estoient conuincus) les condamnations de corps & de biens ne s'en fissent par les Iuges Laiques? & quant aux Ecclesiastiques, qu'ils ne fussent pour delier les condamnez se conuertissans & reuenans à penitence, ou pour les lier s'ils demeuroiët obstinez? Qui doute aussi qu'un sacrilege ne soit vn forfait contre la religion, voire contre la foy, respect & reuerence deuë à Dieu, & à son Eglise? Et que le seculier n'en soit le Iuge, des peines de confiscation de corps & despouille des biens? Que apres la condamnation, ces personnes ne soient deli-

urées aux Ecclesiastiques, pour selon leur penitēce les absoudre, ou lier selon leur obstination: & voila comment, Monsieur, vous nous auez expliqué si doctement ce passage de S. Paul, viuāt ce grand Roy Henry vostre bon maistre, & bien-faicteur: vous en voudriez vous dedire au bas aage de son fils vostre Seigneur?

Ceux de l'affirmatiue demandront peut-estre que nous pretendōs auoir la puissance d'absoudre les subjects d'un Roy qui veut abolir l'Eglise: on leur dira que par la reigle de droit, il n'y a rien plus naturel que de délier toutes choses par le mēme moyē qu'elles ont esté liées: que rien n'a lié les François à l'obligation de fidelité enuers leurs Roys, que la nature qui leur apprend la necessaire obeïssāce, en laquelle ils sont naiz, par la premiere ordonnance de Dieu, quand il a constitué les Rois: & partant qu'ils n'en peuuent estre absous que par dissolution de la nature, qui est à dire la mort: ou bien en habandonnant son Royaume: car il n'y a que les officiers & vassaux qui facent serment à nos Rois: mais cela à cause de leurs offices, ou de leurs fiefs, & s'en faiēt autant à tous autres Seigneurs Suserrins.

Je ne puis aussi obmettre à vous dire
que

que combien que vous ayez renoncé à faire
 preuue du droit, vous ne laissez d'apporter
 des textes dont vous tirez des raisons de
 droit, & dictes que Samuel deposa Saül ou ^{Har.}
 le declara depose, pource qu'il auoit voulu ^{p. 60}
 entreprendre sur l'office des Sacrificateurs:
 mais vostre illustre dignité me pardonnera
 si ie luy dy qu'elle ne s'est pas bien souuenuë
 de cette deposition, ny de la cause; l'vne
 ayant esté faicte, non par Samuel, mais par la
 propre voix du Seigneur qui se repentoit
 de l'auoir faict Roy, dont Samuel fut seule-
 ment le denontiateur: & l'autre pource qu'il
 n'auoit pas mis à mort le Roy Amalech &
 tous ses troupeaux, comme il luy auoit esté
 commandé de Dieu. Car comme il s'excuse
 d'auoir gardé les plus beaux bœufs pour sa-
 crifier au Seigneur, Samuel luy respond, *Ne* ^{I. R.}
sçay tu pas qu'obeissance vaut mieux que sacrifi- ^{c. 15.}
ce. Tellement que ce ne fut point pour ce
 qu'il eust entrepris sur l'office du Sacrifica-
 teur qu'il fut depose: mais pource qu'il auoit
 desobey à Dieu & n'auoit tué Amalech ny
 ses troupeaux.

Ozias ne fut nō plus depose de sa Royau- ¹⁷
 té: Mais admonesté de sortir du temple, il ^{Par.}
 s'en alla plustost par la peur qu'il eut de la ^{c. 16}
 touche que Dieu luy auoit donnée, pour

chastement de son insolence enuers luy, que pour la crainte des paroles des Prestres, & mourut Roy plein de lepre le reste de sa vie.

3. R. Achab ne fut point aussi deposé: Mais au
c. 22 contraire s'estant humilié deuant le Seigneur, Dieu dit à Helie, qu'il détourneroit sa malediction de dessus luy. Il mourut Roy & ses deux fils, Ochofias & Ioram, regnerent en Israël, l'un apres l'autre assez long temps.

Il ne se lit non plus dedans aucun lieu de l'escripture, que Roboam ait esté deposé de sa Royauté: mais seulement que pour l'Idolatrie de son pere Salomon, son Royaume
3. R. fut diuisé & ne luy resta que celuy de Iuda.
c. 11. Celuy d'Israël ayant esté transferé à Ieroboam, non point par l'autorité du Prophete; mais par l'ordonnance expresse de la bouche du Seigneur, signifiee par le Prophete auant la mort de Salomon.

4. R. Athalia ne fut iamais Roynne regnante,
c. 11. mais ayant fait plusieurs de ses petits enfans pour vsurper la Couronne de Iuda, elle en fut dejettee, tuee & honteusement punie.

Ce sont donc choses fabuleuses (pardonnez moy si ie parle ainsi) de dire qu'il y ait iamais eu aucun de ces Roys (que vous alle-

guez) depofé, & encores moins par les Prophetes : Vous ne l'avez pas prefché ainfi, & ne s'en trouue rien par toute la Bible : Mais fi vous difiez que leurs pechez trop frequents & trop abominables, ont fouuent attiré l'ire de Dieu fureux, par laquelle ils ont esté affligé de plufieurs maledictions en leurs perfonnes, celles de leurs enfans, & en leurs Royaumes : cela fe trouueroit veritable, & le tout venant de Dieu & non pas des hommes ny des Prophetes.

Quant à la diftinction que vous apportez des Roys qui fe font obligez à Dieu par vn ferment de Vaffelage. Vofre illufre dignité me pardonnera fi ie luy dy, que la comparaiſon n'en feroit pas receuë, d'autant qu'un Vaffal n'eſt dit qu'au reſpect d'un Seigneur feodal. Or eſt il que la Seigneurie feodale de Dieu a commencé dès que par le droit des gens, il y a eu des Roys fur la terre : Car encore qu'un Vaffal ne face point le ferment à fon Seigneur, il ne laiſſe pas de tenir de luy pour cela. Tellement que d'eſtre fait Chreſtien ou non, cela n'apporte point le droit d'hommage à Dieu ; il luy eſt toujours autant deu auparauant, par les textes cy deſſus alleguez, qui diſent *Que toute puiſſance eſt ordonnée de Dieu, & qui reſiſte au*

Roy resiste à l'ordonnance de Dieu. Cesar n'auoit point fait de serment à Dieu, ny à Iesus-Christ, ains au contraire il auoit vsuré les Royaumes de Iuda & d'Israël; & toutesfois nostre Sauueur le recognoist pour Roy, commande de luy obeir, & aproue sa Iurisdiction. Et si, quand on pretendroit confiscation contre vn Roy par felonnie, elle ne pourroit estre à l'Eglise de Iesus-Christ: puis qu'il a dit que son Royaume n'estoit pas de ce monde, & n'y a laissé aucune succession temporelle.

Je ne repete point les textes des Epistres de S. Paul aux Romains, & de S. Pierre, à ce propos, pour ce que vous dittes qu'ils n'ont parlé que par prouision: mais ie ne laisseray de vous dire, que cette prouision a esté pour vn si lōg temps qu'elle emporte le principal, & prescription contre toutes sortes de personnes priuilegiees: elle est de 500. ans, puisque ne voulez tirer preuue de l'vsage contraire que des 11. derniers siecles; ausquels vous auez réduit vostre cōmencement d'vsage, que les François appellent d'abus: c'est des armes de ces 5. premiers siecles que vous auez toujours combatu & vaincu les plus opiniastrs aduersaires de nostre Eglise, vo⁹ nous les laissez aujourd'huy pour combattre

l'affirmatiue, nous pouuons donc dire, que vous cedez le droit à nostre negatiue; & que de ce long temps n'en pouuez tirer à vostre intention, aucune raison ny exemple. Ce qui nous est de tel aduantage, que nous pouuons asseurer, que vostre prouision ne se peut dire que pendant l'innocence de l'Eglise; Qu'elle estoit tres-puissante en forces spirituelles, de ressusciter les morts, chasser les demōs, guairir les aueugles, paralitiques, muets, & autres affligez de maladies incurables: & iusques à ce que le Prince du mōde eust mis en la main des Ecclesiastiques, les armes temporelles, des ambitiōs, vanitez, richesses, dominatiōs, & autres grandeurs, par lesquelles ils se sont voulu assujectir les Roys & les Peuples.

Car vous ne voudriez pas dire, qu'elle ait esté plus foible & plus timide du temps de Iesus-Christ & des Apostres, qu'elle est aujourd'hui, puis que de leurs paroles ils réuersoient les cohortes par terre; Qu'ils auoient tant de legiōs d'Ange à leur deuotiō; Qu'ils defaisoient les meschans du seul vent de leur halene; Qu'ils pouuoient mettre la mer dedans les villes, & les montagnes dedans la mer: Bref qu'ils faisoient ce qu'ils vouloient & rien ne leur estoit impossible.

Les armes spirituelles sont bien plus for-

tes, plus heureuses & plus victorieuses. Mais depuis que l'esprit de l'homme seruant plus deuotement à ses sens corporels qu'aux choses spirituelles, a commencé à mettre l'esperance de ses forces sur la terre, & oublié l'esprit pour cherir le corps; nous auons raison d'auoir recours au temporel si le spirituel nous habandonne.

Quant au faict dont vostre illustre dignité faict preuue, ce luy seroit vn grand aduantage, si telles preuues auoient de necessaires consequences: mais n'y ayāt rien si perilleux que les exemples, on n'en tire iamais de necessité: estant certain qu'il n'y a aucun malefice qui n'ait son exemple dès le commencement du monde: Il n'y a point de plus grand peché que le murmure & la reuolte contre Dieu: & Lucifer l'auoit desia commise auant la creation de l'homme: Adam l'ensuiuit: Nembrot la commit à la tour de Babel: *Coré, Datan & Abiron* deuant l'Arche de l'alliance: le meurtre fut perpetré entre les deux fils vniques d'Adam, & n'y a aucun peché qui ne puisse tirer son exemple des premiers hommes: c'est pourquoy vn faict n'est iamais prouué par exemple, & quand il le seroit, il y a tousiours de differentes hypotheses qui donnent aussi de diuerses interpretations: les

allegations sont aussi peu considerables, y ayant plusieurs resueries rapportees par les historiēs, des choses qui ne sont de leur tēps: mais quand ils parlent de ce qu'ils ont veu ou de ce qu'ils pensent, lors on regarde la foy & reputation de l'Auther, & toutesfois, (pour estimer tousiours bien fort ce qui sort de vostre bouche) ie rapporteray en jeu vos exemples.

Vous remarquez plusieurs passages de Victor Euagrius, Theod. Anag. Simache, Marcel, Comes, & Cedren: pour monstrier, que les Euesques n'ont voulu sacrer l'Empereur Anastase: mais ils ne disent pas qu'il ne fust point Empereur: ils disent qu'il n'estoit digne d'estre Empereur, puis qu'il estoit Here-tique: & que l'on se reuolta cōtre ses ordon-nances: mais non pas qu'il ait esté depose. Vous apportez l'histoire de Childeric 3. pour iustifier que le Pape Zacharie enuoya aux François absolution de leur serment de fidelité, Qui est alleguer sa turpitude, & mōstrer que sans heresie ny autre sujet que pour fa- uoriser vne proditoire inuasiō, il a constitué sous le manteau de Religio, vn seruiteur dessus son maistre: Qui est vne des impertinen- ces reprouuee par l'Euangile, laquelle ne se fit pas toutesfois gratuitement, mais moyen-

nant la pareille qui luy fut renduë contre Didier Roy des Lombards.

Je voy aussi que vous alleguez plusieurs textes de Sigisbert, Froissart, P. Emile, Zonare, du Tillet, du Haillan, Pour monstrier que nos Roys ont fauorisé les depositions des Empereurs, & Roys d'Angleterre: & profité de celle du Comte Remond: mais soit ainsi: ils estoient hommes, & sujets aux passions humaines, de desirer la ruine de leurs ennemis pour en tirer profit de leurs dépouilles, ou assurance de ce qui leur estoit acquis, & de la paix: aussi cela n'a-il pas sauué les sacrées personnes des Papes, des iustes blasmes dont les liures sont remplis: ces historiës sont aussi alleguez, pour faire cognoistre que nos Rois ont grandement redouté les censures de l'Eglise, qu'aucuns deux en ont esté excōmuniiez (mesmes interdits:) mais qui doute qu'ils ne soient sujets à telles censures cōme les autres hōmes? Toute ame est sujette aux puissances spirituelles: & quant aux interdits & depositions du Royaume; principalement des Roys Philippe le Bel, Charles 6. Loys 12. & Henry 3. & autres de nos Roys: il me semble que les causes en ont esté si prodigieuses, aussi bien que celle de l'Empereur Henry 4. & les euenemens si funestes de meurtres

meurtres & de sang, qu'ils ne deuroient point estre alleguez pour authorité, dedans la Loy de grace.

Nous ne sommes que trop sçauās des entreprises des Papes: & plus encore, d'une infinité de leurs passionnez Ministres, qui leur en baillent plus qu'ils n'en demandēt, elles deuroient plustost estre enseuelies à jamais dedans vne oubliāce perpetuelle, que mises dedans les liures, pour marques eternelles à la posterité, de choses si piteuses.

C'est à nos Roys vne aussi grande gloire, d'auoir pieusement abaissé leurs grandeurs sous le respect de ces persōnes sacrees, que ç'a esté à elles de fast & mōdanité de l'endurer. ce sont deux puissances égales, & distribuees égalemēt, de la main de Dieu sur ses Peuples; dōt l'une doit obeir à l'autre, aux choses spirituelles, cōme il luy doit estre obey aux temporelles. Cen'est pas à vo⁹ qu'il faut dire ces choses: vous auez tout aquis ce que les autres par tant de labeur cherchent de tous costez: & qui auroit profondement sondé le tribunal de vostre cōscience, on y trouueroit sans doute, le vray Antidote de vostre affirmatiue.

Vous auez si dignement faict paroistre à toute la France agitee des impetueux flots de la derniere Ligue, que vous estiez son vray enfant; vous auez si constammēt soustenu a,

uec nous les premieres fureurs de la tēpeſte
 tramōtane: vous auez d'vne ſi diuine amour,
 ſuiuy, deſſendu & touſiours fidellement em-
 braſſé le party du deſſunct Roy pendāt qu'il
 eſtoit hors del'Egliſe, qui dōne maintenant
 changement à vos vœux, ſous vn Roy tant
 Catholique, ſi ſoigneuſement nourry, eleué,
 & inſtruit à tous exercices de pieté, dignes
 d'vn ſi grand Prince. Ha! Monsieur, vous ne
 deuez pas moins à voſtre pays & voſtre hon-
 neur qu'à vos amis: mais pluſtoſt ne ſont-ils
 pas vos amis, ceux qui par les imprudents ef-
 fors de leurs vaines pēſées, vous ont ſurpris &
 vous portent innocent, à la deſtruction de
 voſtre Maiſtre, & fils du pere de voſtre ſi bel-
 le fortune.

Quelqu'autre nouuel amour vous a-t-il
 bandé les yeux, & comme à Salomon, fait re-
 nōcer à ſageſſe pour adorer des imaginatiōs
 trompeuſes? Ne voyez vous pas les impietez
 de cette affirmatiue de poſition de nos Roys?
 prenez vn morceau de foye de ce poiſſon de
 Thobie & deſſillez vos yeux, pour recognoi-
 ſtre la verité: Nous vous ferons voir que tou-
 tes les autres Nations ne ſont point de voſtre
 opinion, & que de tous les 3. Royaumes he-
 reditaires de la Chreſtiēté, dōt les Roys ſont
 profeſſion de la Religiō Catholique, il n'y en
 a vn ſeul qui ne tienne la negatiue: & quant

aux électifs, il y a tant de Princes particuliers & republiques de religions contraires dedans le fonds de leurs Estats, qu'il n'est ja besoin de s'en enquerir d'auantage.

La France en premier lieu vous desplaist, de sa trop grande franchise, & sa fidelité est importune à ceux de vostre affirmatiue: fidelité disie, qui de toute eternité a porté le renom des François, sans aucune souillure de loyauté enuers ses Princes, dās la gloire des cieux, vous luy jettez aujourdhuy sur les yeux vostre iniuste blasme, de s'estre laissé salir d'une tache immortelle de schisme & diuision, des autres nations.

Et quoy, l'Espagne a-t-elle souffert l'ignominieux opprobre d'esclavage, que monsieur le Cardinal Baronius luy jettoit sur le col par son .ii. liure de ses Annales? A-t-elle pas donné son Edict fulminant cōtre les indeuës possessions qu'il attribuoit aux Papes sur ses Coronnes? Et quoy, la Seigneurie de Venise a-t-elle endure les entreprises illegitimes de nostre S. Pere? A-t-elle porté aucune reuerence ou obeissance, à l'interdiction tēporelle qu'on auoit fulminee sur ses Royaumes, Estats & Seigneuries? Non Monsieur, ny les Espagnols, ny les Venitiens, n'ont aucune creance à telles damnables depositions: S'ils y eussent creu ils n'eussent pas eu le cœur de

si bien s'en deffendre.

Pourquoy pensez-vous que l'on croye les Royaumes d'Angleterre, d'Escoffe, de Danemarc, de Noruege, de Suede & de Transilvanie, les Principautez d'Allemagne, de Pologne, de Suisse & de Flādres, & tant d'ames Françoises s'estre diuisees, ou plustost affranchies des pesantes dominations de la Seigneurie Romaine: si ce n'a esté l'insolent joug de la seruitude qu'on leur a voulu imposer? C'est ce que S. Bernard presageoit si diuinement par les considerations au Pape Eugene, qu'en voulant embrasser les deux puissances spirituelle & temporelle, il perdrait toutes les deux: vous avez bien reconnu par les familiers discours que vous avez eus avec le Serenissime Roy de la Grande Bretagne, que l'une des principales occasions de son refus, est l'aprehension de cette insupportable Loy de deposition & abandonnement aux meurtres: ô Monsieur, ce n'est dōc pas estre Schismatiques, que de croire ce que toutes ces autres Nations Catholiques croient, & ce que croyoient encores les autres auāt qu'elles fussent deuoyees: le Schisme n'est pas, quand vn tout se diuise en plusieurs parties: Autrement les Peres Iesuites & Iacobins qui disputent si differemment, & opiniastrement de la grace, seroient Schismatiques: mais bien, quand vne partie, ou

membre, se diuise de la creance vniuerselle D.
 de tout le corps. C'est donc à Messieurs de 24.
 l'affirmatiue à penser à leurs consciences 93
 puisque eux seuls en toute la terre auent
 soustenir que le Pape peut deposer les Roys.
 Les Conciles que nous auons cottez de To-
 lede, & les reuoltes des Protestâs nous don-
 nent les marques de leur ancienne creance &
 les nouueaux Edicts d'Espagne & de Venise
 aprennent aux autres Princes combien vn
 tel ioug leur seroit insupportable.

Je me pourrois seruir pour preuue de mon
 sixiesme poinct de plusieurs bons tesmoings
 produits en vostre harangue, & d'un nom-
 bre infiny de personages signalez de tres-
 sainte vie & de fort entiere reputation: mais
 pource qu'il est escript, *Que de la bouche de
 deux ou trois tesmoings on peut tirer toute verité,*
 Je me contenteray d'en apporter l'auis d'un pe-
 tit nombre, dont vne partie sera irreprocha-
 ble pource que les auez alleguez, & les autres
 d'autorité telle, que chacun est obligé de
 les croire. Je soustiens que de tout tēps, mesmes,
 depuis vnze cēs ans les plus saints Personnages de
 l'Eglise, Papes, Docteurs & autres Chrestiens &
 vrais Catholiques, ont tenu la negatiue, mesmes par
 effect & obeissance. Et l'autorité des Papes me
 seruira de garentie depuis les vnze cens ans:
 Dont la premiere me viēt en main de S. Gre-
 goire, lequel pour la grandeur de son sçauoir

& de la bonne vie, s'aquit à bon droit le nom de Grand, de Saint, & de Docteur de la sainte Eglise. Il dit dedans vne sienne Epistre adressee à l'Empereur Maurice, *Je suis sujet à vos*
 Lib. 2. ep. 61. *comandements, & pource la Loy d'interdictiō aux Colleges Ecclesiastiques de recevoir vos soldats à s'y vouër: ie l'ay faiēt passer en diuers lieux de vos terres & seigneuries: & d'autāt qu'elle ne me semble pas cōuenir avec celle du grād Dieu, i'en ay biē voulu enuoyer mō aduis à vostre serenissime Maïesté: de sorte que i'ay satisfaiēt à mon deuoir enuers l'Empereur, en executāt son commandement, & enuers Dieu en vous disant librement ce que i'ay estimé estre de sō seruice.* Il dit encore en vne autre Epistre, *Celuy est coupable enuers le tout puissant, qui*
 Lib. 2. ep. 62. *en tout ce qu'il dit & fait, n'est pur enuers ses serenissimes Seigneurs. Et moy indigne seruiteur de vostre pieté. Et en vn autre endroit, Nostre*
 Lib. 4. ep. 75. *Roy ne se doit fascher cōtre les Euesques: mais leur cōmander & les regir, cōme Citoyens de la republique, & les honorer aussi, cōme Ministres de Dieu.* Et en vn autre passage, *Quand ie parle à mes Seigneurs, que suis-je sinon poussiere & vn ver de terre: toutesfois i'ay satisfaiēt à ce que i'ay deu qui ay rendu l'obeïssance à l'Empereur, & ne me suis point teu de ce que i'ay deu à Dieu.*

Le Pape Agaton nous dōne aussi tesmoignage de l'obeïssance des Ecclesiastiques de ces premiers tēps enuers les Empereurs, disant par vne siēne Epistre à l'Empereur Con-

stantin le Barbu, le suis prest de rendre pröpte & ^{Con.}
 effectuelle obeissance aux choses qui m'ont esté cö-^{4.}
 mandees par les patentes sacrees de vostre tres.cle-^{Cöst.}
 mente fortitude de chercher des personnes propres
 à enuoyer au Concile, pour accöplir l'obeissance de
 nostre seruice, en les faifant incontinent aller aux
 tres-precieux pieds de vostre douceur. Et plus bas.
 Suivant le trespieux cömandement de vos Clemen-
 ces, & pour l'obeissance que nous vous deuons.

Le Pape Leon 4. escrit de pareille humilité
 à l'Empereur Loys, Si nous n'auons, dit-il, ^{Cam.} suiuy
 le chemin de l'equité enuers les sujets, nous sommes ^{nos se}
 prests de reparer la faute à vostre iugement ou de ^{Iur.}
 vos deleguez. Car si nous qui deuös corriger les pe-^{c. 2.}
 chez des autres, faisons pis qu'eux, nous serios ^{q. 7.} Mai-
 stres d'erreur. Parquoy nous supplions la clemence
 de vostre grädeur, d'enuoyer icy des Commissaires,
 pour informer de nos deportemens.

Encore que S. Aug. ne soit point des 1100.
 ans auxquels il vous a pleu restraindre le tēps
 de vostre preuue, si est ce que cette matiere
 vous necessitāt au lieu du droict auquel vous
 auez renoncé, de vous seruir de toutes sortes
 d'autoritez antiēnes, pour suplement de ce
 defect, vous l'auuez amené en jeu, pour forti-
 fier vostre dire: C'est dōc vn tesmoing affidé
 sans reproche, estant produit des deux costez
 lequel parlāt de l'Empereur Iulian l'Apostat
 dit, Iulian fut Empereur infidele, Apostat & per-^{Aug.}
 secuteur, ^{lib.} toute fois il y auoit des Legions Chrestien-124.

nes qui le seruoient. Quand il leur disoit, allez *ba-*
tailler contre tel ou tel peuple: ils y alloient sans re-
 cognoistre. Mais quand il leur commandoit d'ado-
 rer ou de sacrifier aux Idoles, ils preferoient Dieu à
 l'Empereur.

Or. S. Ambroise ce grand personnage dont S.
 col. Augustin a prins ses diuines instructions, dit
 Aux l. 5. Il m'est bien permis de me lamenter, mes pleurs sont
 mes legitimes armes, contre les Gots & leurs sol-
 dats, telles sont les armes d'un Prestre, & ne puis
 ny ne dois scauoir autre resistance.

13. à S. Chryf. sur le 13. aux Romains dit, que quād
 Ro. S. Paul cōmande que toute ame soit sujete aux puis-
 sances superieures, il parle à tous, mesmes aux Her-
 mites & aux Prestres, quand mesme ce seroit un
 Apostre, un Euangeliste, un Prophete, ou qui que
 ce soit, il doit estre suiet au Magistrat: car, dit-il, la
 subiection n'aneantit pas la pieté.

H. Ozius l'un de vos témoins alleguez en la 61.
 p. 62 pag. de vostre Harangue, (dit au même lieu à
 l'Emper. Const.) Dieu vous a donné l'Empire
 en garde, & nous a commis les choses de l'Eglise: il
 ne nous est donc pas permis de tenir icy domination
 en terre, & comme cela nous est deffendu, aussi,
 ô Empereur, ne vous est-il permis d'vser d'aucu-
 ne puissance sur le seruice de Dieu.

Hist. Sainct Gregoire Euesque de Tours, dont
 lib. aussi l'autorité vous est si recommandée,
 s. c. (dit) Si quelqu'un de nous (mon Roy) veut outre-
 18. passer

passer le chemin de iustice, vous le pouuez chastier : mais si vous transgressez, qui vous reprendra ? qui vous pourra condamner, sinon celuy qui se diët la iustice mesmes ?

Sainct Bernard ce diuin oracle de France, escrit aussi diuinement au Pape Eugene sur ce subiect en ces termes, Sainct Pierre ne pou-
 uoit donner ce qu'il n'auoit point : mais il a laissé à ses successeurs ce qu'il auoit ; sçauoir le soin des Eglises : vostre puissance n'est point sur les possessions, mais sur les pechez : vous auez receu les clefs du Royaume celeste, non pour estre grand Seigneur : mais pour auoir la correction des Vices. Cete superiorité terrienne a ses Iuges, qui sont les Rois & Princes de la terre. Pourquoi enuahissez-vous les limites d'autrui ? vous estes faiët supérieur, mais non pour dominer : qu'il vous souuienne que vostre office est de ministration & service, non point de seigneurie, qu'il vous faut vne besche pour cultiuer la vigne du Seigneur, & non pas porter vn sceptre, la domination est interdictë aux Apostres.

Lib. 2. d.
 Conf. id.

Et puis tirant des puissantes forces des Canons de l'Arcenac du premier de vos vnze
 siecles, ils annōceront par leurs foudroyātes
 voix, Que quād S. Pierre, le premier des Apostres
 tira le glaive, il luy fut aussi tost deffendu par nostre
 Seigneur : comme luy voulant annoncer que
 s'il luy auoit esté permis, & à ses predecesseurs ius-
 ques là, d'vser du glaive temporel contre les ennemis

Can. D.
 Epif. ca.
 23. q. 8.

de Dieu : Il se falloit à l'aduenir seruir du glaive spi-
rituel, de bons exemples, & de patience, selon la pa-
role, pour destruire le vieil homme, n'appartenant
qu'à l'homme qui a la puissance legitime de porter
l'espee, à vser du glaive, & tous les autres qui en
vsent periront.

Can. pr.
sec. ca. 23
q. 5.

J'ay cy deuant allegué vn autre Canõ del'E-
glise, qui monstre que les Ecclesiastiques
n'ayãs aucune force temporelle legitime en
main, sont cõtrains d'auoir recours (par l'or-
donnance diuine) aux Princes du siecle qui
doiuent rendre compte des ames comme à
eux données en garde. Il y en a vn autre du

C. 13.
Cons. Me.

Concile de Meaux, qui diët, si quelqu'un en-
treprend de contredire par esprit de rebellion &
d'orgueil à la puissance Royale, laquelle selõ S. Paul
au 13. chap. de l'epistre aux Romains, n'est que de
Dieu seul, qu'il soit anathematisé.

Can. non.
pil. q. 8.
c. 23.

Can. co-
num.

Vn autre Canõ des decrets del'Egl. dit que les
armes de l'Eglise sõt les larmes, car telles sõt les for-
teresses & répars des Pasteurs, & ne leur est pas per-
mis de resister, ny se deffendre avec d'autres armes.

Ch. 75.

Il est aussi rapporté dedans le 4. Concile
de Toledé, qui fut tenu sous S. Honoré Pa-
pe, & sous l'Empereur Heraclius, vn saint
Canon qui vuide du tout cette question en
ces termes, la perfidie des esprits de plusieurs na-
tions, leur faict mespriser de garder la foy à leurs
Rois. Et apres, gardõs à nos Rois la foy promise, &
que la subtilité de l'impie infidelité ne soit en nous,

comme en autres nations: & quiconque de nous, ou des peuples de toute l'Espagne, par quelque coniuration ou dessein, aura violé le serment de la foy promise pour sa patrie, ou pour la conseruatiō de la vie du Roy, ou aura mis la main sur le Roy pour le tuer, ou pour le despoüiller de la puissance de son Royaume, qu'il soit Anatheme en la face de Dieu & des Anges, & soit retranché de l'Eglise Catholique. Cete mesme ordonnance fut reiterée au 6. Concile de Toledede, de ne point deposer les Rois.

Ie ne vous parleray point de l'arrest donné contre Tanquerel en l'an 1561. ny de la retraction honorable qu'il fit solennellement, puis qu'elle vous a fasché en ce qu'il se repēt d'auoir donné trop de pouuoir aux Papes, Ny de ce que dict Sigisbert que vous voyez restraindre leur puissance dedans les bornes que S. Augustin & ces autres antiēs luy ont prescrites. Mais ie vous feray ressouuenir du decret de la Sorbonne fait en l'an 1595. en la presence de Mōsieur le Cardinal de Gondy, par lequel est déclaré, que tous François & subiects doivent leuer tous scrupules & difficultez de rendre entiere obeïssance au Roy nostre Sire, Henry IIII. & de faire prieres tant publiques en la sainte Messe & ailleurs, que particulieres pour la conseruatiō & prosperité de sa Majesté, sous pre-texte de Religion, & qu'il n'a esté recogneu par nostre saint Pere le Pape, &c.

Le luy mettray aussi en memoire le decre-
de la mesme Sorbonne de l'an 1413. sur la
darnable proposition condamnée au Con-
cile de Constance, confirmé & reïteré par
autre decret de l'an 1610. Par lequel est dict,
qu'il appartient seulemēt au Prince & Magistrat
politique, d'vser de glaiue, suiuant l'epistre de S. Paul
aux Rom. Ch. 13. Que depuis quelques années cer-
taines opinions estrangeres, seditieuses, & impies,
ont tellement peruertyl l'esprit de plusieurs hommes,
qu'ils n'ont eu en horreur souiller les Rois, & les
Princes, du nom execrable de Tyran, & en conse-
quēce d'un si detestable pretexte, cōme aussi d'aduā-
cer la pieté, la Religion ou le bien public, de conspirer
contre leurs personnes sacrées, &c.

Nic. Gil.
S. Loys.

Nos Rois & leurs subjects, fondez en la
proteçtiō de tous ces beaux titres, n'ont pas
moins resisté aux entreprises des Papes. S.
Louys, dont le renō de sainteté volera de-
dans la memoire de tous les siècles, par sa
pragmatique sanction, se plainct de la Simo-
nie de la Cour de Rome, & la deffend.

N. 6. r.
vol. f. 131.

Le Roy Philippes le Bel escrit au Pape Bo-
niface 8. que vous dites Antipape & accusé
d'heresie. Philippes par la grace de Dieu Roy
des François; à Boniface, se portant pour souue-
rain Pontife; peu ou point de salut, &c. sçache que
nous ne sommes sujets à personne aux choses tem-
porelles qu'à Dieu. Tous ses sujets escriuirent
vne lettre au College des Cardinaux en l'an

1302. Par laquelle ils disent que li Roy & les habitans du Royaume ont tousiours esté sujets en temporalité de Dieu tant seulement: Et il n'appartient à personne de corriger nos excès ou dommages, fors à nostre Seigneur le Roy. Et bien voulons que soyeZ certains, que ny par vie ny par mort, ne nous departi rons fust ores ainsi que nostre Sire le Roy le voust bien. Le sieur du Tillet dit que la Bulle d'interdiction de ce Pape fut bruslee, & l'appelle impudent & ceux qui luy adherent esceruelez.

Soubs le regne de Charles 6. du nom Roy de France le Pape Benedic ne voulant obeir à vne sienne Ordonnance pour l'vnion de l'Eglise, l'Vniuersité de Paris en presence du Roy, des Princes, Prelats & Seigneurs seans au Parlement, ayant requis que la Bule d'excommunication de ce Pape contre le Roy & son Royaume, fust deschirée, cōme injurieuse & offensue à la Majesté Royale. Et depuis le Procureur general baillé ses conclusions, est donné arrest, qui fut executé en l'an 1408. à sçauoir, Que le Roy ayant fait assembler au Palais les Prelats, Y furent amenez M. Claude Sanceloup Aragonnois, & vn Cheuaucheur de ce Pape, chacū en vn tombereau & vestu d'une tunique de toile peinte, où estoit, dit l'Auteur, en bref esgiée la presentation des mauuaises Bulles dont est mention, Et les armes de Benedic renuersees. & eux encore mittrez de mittres de pa-

pier en leurs testes, & furent eschafaudéz publiquement en la cour du Palais. &c.

N. Le Roy Charles 8. en l'an 1494. entra de-
 Gil. dans Rome, y fit dresser diuerses iustices &
 2.v. executer plusieurs, tant Romains que Fran-
 f.127 çois.

Gai. Le Roy Loys 12. qui merita le surnom de
 li.1. Pere du Peuple, ayant fait proposer à tous
 les Prelats de s^{on} Royaume, & plusieurs Do-
 cteurs assemblez en sa ville de Tours, huit
 N. questions contre le Pape Iules 2. ils determi-
 Gil. nent, *Que le Pape ne pouuoit faire guerre contre*
 2.v. *les Princes temporels es terres non estās du domai-*
 .135 *ne de l'Eglise. Qu'il estoit permis à vn Prince dont*
le Pape estoit ennemy, de prendre les terres de l'E-
glise pour l'affoiblir, & non pour s'en approprier. Que
ce Prince se pouuoit soustraire de l'obeyssance du
Pape, non vniuersellemēt, mais pour la deffence de
ses choses tēporelles: Qu'il ne pouuoit pour tout ce-
la estre censuré.

L'an 1563. le Pape Pie 4. ayant ietté vn mo-
 nitoire contre la Royne de Nauarre ayeule
 de nostre Roy, par lequel à faute de se trou-
 uer à Rome dedās 6. mois, il la declare priuée
 de son Royaume. Le Roy Charles 9. rescrit
 au Pape, qu'il ne peut ny doit endurer cela,
 qui ne luy appartient aucunement, & prote-
 ste, s'il ne retire son monitoire, d'en empes-
 cher l'execution, par la puissance que Dieu
 luy a mise en main.

Le deffunt Roy dernier decedé, & deffunt Monseigneur le Prince de Condé, ayās esté excōmuniez, & leurs biens esté exposez par le Pape Sixte 5. le Parlement incontinent en fit des remōstrāces au Roy, luy disant, *qu'elle ne recognoissoit point en cete Bulle, la voye des successeurs de S. Pierre, ils n'auoiēt recogneu les Princes de France iusticiables de Rome, & declare cete Bulle desrogeante à la souueraineté de la Couronne de France.*

En l'annee 1591. le Pape Gregoire 14. enuoya vne Bulle, par laquelle il excōmunioit le Roy, & tous les François tenans son party (& par consequent vous monsieur, comme les autres) *Les Cardinaux, Archeuesques, Euesques, Abbez, Chapitres & autres Ecclesiastiques assemblez, & conuoquez à Mante, & depuis à Chartres declarerent cete Bulle nulle & de nul pouuoir.*

Et depuis, sur les conclusions de monsieur le Procureur general, elle fut bruslee publiquement par arrest du Parlement seant à Tours, comme pleine de faucetez, d'imposture & de sedition.

Monsieur du Tillet l'un de vos plus familiers auteurs, & dont l'autorité est de grande valeur enuers les plus grāds personnages dit bien dedans les resueries qu'il raporte de l'antiquité, ce que vous alleguez de ses memoires : mais quand il parle de son temps & de ce qu'il a trouué de veritable dedans les

registres sacrez du Parlemēt, il emplit ses paroles de suc & de raisons. Vrais interpretes de toutes les captieuses allegations de la partie affirmatiue. Il dit donc dās son traicté des libertez de l'Eglise Gallicane: Combien qu'aux seuls Prelats & Ministres de l'Eglise, soit cōmise la spiritualité, qui est la plus digne charge du salut des ames, ^{M. d. tit. tr. d. leg. Gat.} et interdite aux Rois & Princes tēporels: toutesfois en leur domination temporelle est comprise toute la police publique, de laquelle est la 1. part, la protection garde & conseruatiō de l'ordre & discipline de l'estat Ecclesiast. de leur Potentat. Louys Debōnaire (dit-il, tesmoigne des plus religieux Catholiques) disoit que par tous les pays de son obeissance en sa personne cōsistoit cōmise de Dieu, la charge et sollicitude de sa sainte Eglise, cōme des autres Estats de son Empire; Estoiēt les Prelats ses coadiuteurs, luy tenu de respondre denāt le Createur, de leur negligence & de la sienne.

Autant en recogneurēt les Euesques au Concile de Cologne, par l'admonition qu'ils firent au Roy Charles le Chauue: & vn peu apres, tant qu'en France l'Eglise a esté gouuernee & policee sous l'autoritiē des Roys tres-Chrestiens, & non sous celle des Papes, elle a esté approchantē de la 1. et Apostolique, & la moins & plus tard corrompue que nulle autre. Le mal depuis auenu est procedē, quād la puissance absoluē des Papes a esté endurce en ce Royaume. Et encore apres il dit, Quād les Eueschez estoient vacans, il est cogneu par les histoires de S. Greg. de Tours & d'Amoins, qui en recitent plusieurs exemples, qu'auparauāt Charlemagne, les Rois les donnoient, & aucune eslection ne valloit si elle n'estoit approuuee par le Roy. Et ainsi l'auoit ordonné le Pape Boniface

niface 3. du temps duquel l'Empereur Pocas declara l'Eglise de Rome estre le Chef de toutes les autres. Et dit en suite vne infinité de tres-belles choses, qui enseignent clairement les progresz & successiues vsurations des Papes.

Après toutes ces saintes autoritez, suivies de siecle en siecle depuis le Prophete Samuel iusques à nos iours, qu'est-ce que peuuent servir vos allegations des histoires prophanes? que vous dites vous apprendre, que plusieurs fois on a refusé de recognoistre les Empereurs & Roys heretiques, & ceux qui les souffroient ou les fauorisoient, encore qu'ils ne fissent aucune persecution aux Chrestiens ou Catholiques? Mais qu'est-ce que ne diront point les François de ces exemples, qu'ils trouuerôt du tout hors des termes du fait de vostre affirmatiue, ils croiront sans doubte, & avec raison, que de ceux qui poursuiuront la ruine totale de l'Eglise, & des Chrestiens (*qui est vostre seul cas de demission*), vous ne passez pas seulement aux simples persecuteurs, ny aux pacifiques heretiques, mais iusques aux Tyrans: & non seulement aux Tyrans, mais aux Rois legitimes, que vous voudriez en fin deposer à la premiere passion de ceux de l'affirmatiue. Suiuant les malheureux enseignemens du sieur Cardinal Belarmin, & de Mariana, Be-

canus, Molina, & autres dessus nomméz : ainsi que l'a iudicieusement preueu cete sacree faculté de Theologie, par son decret de l'an 1413. cy-dessus recité.

S'il falloit deposer les Princes qui endurent ou fauorisent les Heretiques dedans leurs Seigneuries, Que deuiendroient les Papes? puiſque les plus abominables heretiques du monde, trouuent ſoubs l'Asile de leur douce clemence vne ſeure retraicte? Que les Iuifs ennemis de nostre Sauueur, de la ſaincte Eglise, & du S. Esprit, ne ſont pas ſeulement tolerez : mais maintenus & ſupportez par toute l'Italie, pour de l'argent.

Il faudroit demolir cet aſſeure répart des ennemis de la Religion Chreſtienne, pour faire receuoir vos exemples, de deposer les autres Princes, qui tolèrent les heretiques, dont ils ſont tant incommodez. Si les aſſerteurs ne commandent par là, il eſt fort malaiſé qu'ils puiſſent deceuoir aucun, ſoubs la pipeuſe couuerture du mâteau de ſainct zele: les peuples ſont trop rebattus de toutes ces mocqueries pour y donner creance.

Nous ſouſtenons donc pour noſtre 7 & dernier point, & par nos autoritez ſuſdites, depuis Samuel iuſques à S. Gregoire le Grãd, qui ſont les ſacrez fondemens du droit que vous nous concedez, iuſques au 6. ſiecle, depuis la loy de grace : & par celles de tant de

saincts personnages (dont le tesmoignage a esté par vous melme apporté.) Que l'affirmatiue n'est fondée en droict, ny en raison, ny en aucune autorité valable: & interpellans vostre creance François, Nous vous supplions de la declarer heretique, comme certainement elle l'est, & fausse, & seditieuse, & portant sur le front des marques certaines de crime de lezeMajesté diuine & humaine.

Je me cognois bien destitué du caractere valable, pour donner vne sentence efficace, cōtre les asserteurs d'vne mauuaise ou nouuelle doctrine: Mais par le iugement cōmun dont vous nous faites abhorrer ceux que vous nommez heretiques, par les marques que vous leur apposez de leurs heresies: & par les maximes certaines que nous auons ouy tenir dedās la Chaire de verité, aux plus asseurez auteurs de l'affirmatiue; *Que tous ceux qui tiennent vne opinion contraire à l'institu-* C. 81
tion diuine, commandemens de Dieu, & preceptes D. si.
de nostre Sauueur Iesus-Christ, dont l'instruction q. su.
nous a esté donnée par les Apostres, & la traditue press.
par les Saincts Peres, Nous pouuons dire par vn iugement priué, que ceux de l'affirmatiue contrene-
nans à toutes ces choses, approchent bien pres de l'heresie: & par nostre propre cognoissance parti-
culiere, qu'ils sont vrayment criminels de leze
Majesté de nos Rois.

ff. tit. Il est autant ou plus permis aux personnes
ad l. Laicques, de prononcer du crime de leze
Int. Maiefté diuine, qu'aux Ecclesiastiques, de la
ma. priuation des biens & de positiō des Princes.

Il y a deux Chefs du crime de leze Majesté humaine, pour le premier desquels les Citoyens Romains n'estoient pas exempts du dernier supplice: mais il y en a vn pardessus, pour lequel la loy n'a esté faite, que comme aux parricides, dōt il tiēt le souuerain degré.

Le salut du Prince est la suprême loy de l'estat, ce salut ne consiste qu'en deux points, qui sont la conseruation de sa vie, qui luy donne son estre en la nature: Et de son Estat qui luy donne l'estre de Prince. La mort des Rois est la priuation de leurs vies: & leur deposition est la priuation de leurs Royaumes: il n'y a rien de si contraire à l'estre, que la priuation: il n'y a point de retour d'aucune de ces priuations au premier estre. Qui peut donc doubter, qu'une simple pensee de la deposition du Roy, ne deust estre punie d'un demembrement, ou du feu? Vn Gentilhomme du temps du grand Roy François en fut executé, pour auoir cōfessé son simple desir d'attenter à sa vie. Aussi en vn estat bien policé, & remply de fidelles ames, ceux qui de leurs seules presences ont assisté vostre discours, en souffriroient les peines ordonnées aux infracteurs de cete suprême loy.

O qu'ils se ſçauēt bien preualoir du bas âge de noſtre ieune Prince ! Quoy le fils de ce grād Roy, terreur de l'vniuers, & tant victorieux, perdra-t-il en ſes iours pleins de paix, ſa ſouueraineté, que le petit Roy Charles 9. a conſeruée, au milieu de ſes guerres ciuiles ? Où eſt l'honneur des François ? Où eſt vne Royne Catherine de Medicis, qui d'vne ame hardie deffendit le Roy & ſes ſujets en bien moindre importance ? Où eſt ce grand Chancelier de l'hospital, plus amy de l'honneur & du Roy que des grandes richesses ? Où ſōt vn premier Preſident de Thou, vn Procureur general Bourdin, vn Aduocat du Menil ? Et où eſt cete Cour de Parlement ſi auguſtement animée de l'amour de ſon Roy ? Ils dorment ces gens de bien, & ſ'il n'y a que Dieu qui les puiſſe faire reuiure. Mais il nous a donné vne Royne Marie, & faiēt re naiſſre des nouuelles vertus de celles de nos anceſtres.

Les Roys ſont de Conſtitution diuine, l'obeiſſance eſt cōmādee de Dieu à leurs ſujets confirmee de noſtre Sauueur Ieſus-Chriſt, par luy executee, & par ſes Apoſtres.

Si ils ont ſi courageuſemēt couru à l'humble obeiſſance du glorieux martyre, ſous les commandemēs des Empereurs Payens, qui les ont perſecutez par tant & tant de ſiecles, ſans y oppoſer la reſiſtance de leurs diuines

vertus, trop plus puissantes que toutes les forces mondaines: commēt peut-on feindre aujourd'huy vn cas de persecution, pour lequel on veuille atēter à la depositiō des Rois?

Les Emper. Nerō, Domitiā, Trajā, Severe, Diocletian, & vne infinité d'autres n'ont-ils esté que simplement Payés? N'ont ils esté que simplement ennemis de la foy Chrestienne? Mais n'ont ils point esté cruels persecuteurs des Chrestiens, par toutes sortes de tres inhumains suplices? Et toutefois il ne s'est trouué de leurs tēps, vn seul Chrestien qui ait inuenté la distinction de cere affirmatiue. Puis dōc que le Sauueur, les Apostres, & les saints sont les vrays exemplaires de l'obeyssance, mesmes aux infideles persecuteurs & destructeurs de l'Eglise Chrestienne, qui peut on dire l'inuēteur, l'asserteur, ou le protecteur de la reuolte & rebellion, ou de la deposition du Prince, si ce n'estoit Sathan? Hé! qui est ce dōc qui met le plus en peril la vie des Rois, que ceux qui afferment qu'ils peuuent estre deposez & tuez en guerre? Et on le vous a fait dire, Monsieur; pleust-il à Dieu que ces affirmants eussent esté autant que moy, amateurs de la bonne reputation que vous auiez acquise; ils ne l'eussent pas si negligemment, ou malicieusement exposée à la condemnatiō, dont ie la voy profcrite, par la bouche de tous les gens de bien,

bons François & des plus vrayemēt Catho-
liques. Quoy, Monsieur? falloir-il qu'une si
damnable proposition, si seditieuse, & si per-
nitieuse, trouuast du support en vostre bou-
che? vne proposition dis-je, de déposer nos
Roys, puis que ces Tyrans, cruels persecu-
teurs des Chrestiens & destructeurs de l'E-
glise, n'ont trouué Dieu ny les hommes de leurs
temps, portez de telles pensees: Mais à quel-
le fin porte-t-on dedans les cœurs des peu-
ples la sinistre apprehension d'un si tragique
euenement, si ce n'est pour les empêcher de
fermer du tout les oreilles, à telles seditieu-
ses persuasions.

Vous dites que l'affirmatiue est desia im-
primee dedans les affectiōs d'une partie de
la Frâce, & receuë par toutes les nations estrā-
geres. Mais ja à Dieu ne plaise, que les Fran-
çois soiēt rendus dignes de telle maledictiō.
Il n'y a dans ce Royaume que trop grand
nombre d'ames susceptibles de mauuais cō-
seils. Les assassinats de nos Roys n'ont point
esté commis contre des Princes infideles ny
persecuteurs de l'Eglise. Pour Dieu, Monsieur,
ne soyez ministre ny operateur de ces flam-
beaux de desolation & de misere.

Les Predicateurs ont desia d'une animeu-
se voix oppugné cete affirmatiue. Ce n'est
point avec vous que ie la dispute, ny à vous
que j'adresse ma voix; car chacū sçait qu'en

tristesse de cœur vous en auez proferé les paroles : que vostre ame bien nec n'y a point consenty. Plusieurs ont estimé, qu'en delaisant le droict qui est du tout à l'auantage des Roys vous l'auez mis à part, pour en tirer comme d'un tresor reserué, les puissantes raisons dōt on espere vous voir retourner plus courageusement à la deffense de vostre patrie.

La France a ressentý tant d'excellēs effets de vostre bonté naturelle, & nos Rois recogneu vostre ame si pieuse enuers Dieu, & si esloignee de toute ingratitude enuers eux, qui vous ont tant fait de bien; que les François ne sont encore hors d'esperāce, de vous voir, en suite de tant de saints personnages dont i'ay raporté les exēples, faire recognoistre par les puissantes forces de ces raisons de droict; Que nos Roys sont si fermemēt establis par toutes les loix diuines, en leurs puissances temporelles sur leurs sujets, qu'ils ne les doiuent tenir que de Dieu seul, sans en recognoistre aucune superieure en ce monde.

F I N.

